



Sesida dals

Communitgà il

Protocol nr.

28 da favrer 2023

1. da mars 2023

163/2023

### **Incumbensa Mazzetta**

concernent in plan d'acziun per stgauraments electricis fin l'onn 2030

### **Resposta da la Regenza**

La Lescha d'energia dal chantun Grischun (LEG; DG 820.200) cuntegna dapi l'onn 2011 – tar las prescripziuns da construcziun – in scumond d'installar novs stgauraments electricis da resistenza fixes (art. 10 LEG). Igl è incontestà, che stgauraments electricis èn fitg ineffizients areguard l'energia e ch'els han in grond potenzial da spargn. En il rom da la consultaziun tar la revisiun da la LEG ch'è entrada en vigur il schaner 2021, aveva la Regenza proponì in'obligaziun da sanaziun per stgauraments electricis cun in termin transitoric da 15 onns. Questa proposta ha chattà pauc sustegn tar las participantas ed ils participants da la consultaziun. Perquai ha la Regenza renunzià d'inserir la proposta en la missiva al Cussegl grond. En il rom da la predeliberaziun en la Cumissiun per ambient, traffic ed energia (CATE) ha ina minoritad puspè integrà questa proposta che correspunda al Model da prescripziuns energeticas dals chantuns (MoPEC 2014). A chaschun da la debatta dals 20 da favrer 2020 ha il Cussegl grond refusà questa proposta cun 70 vuschs affirmativas e cun 23 vuschs negativas e 0 abstenziuns (cf. PCG sessiun da favrer 2020, p. 690).

Sch'i vegnan remplazzads stgauraments electricis, ston ins differenziar tranter systems centrals e systems decentralis. La Regenza è persvadida, ch'ils stgauraments electricis centrals vegnan remplazzads ils proxims onns, quai pervia dals pretschs d'electricitad pli auts e pervia da las contribuziuns da promoziun generusas ed er perquai che quest remplazzament sa lascha realisar – en la pli gronda part dals cas – en moda economica e simpla areguard la construcziun. Remplazzar stgauraments electricis decentralis percenter pretenda ina relativamain gronda intervenziun en ils edifizis, perquai ch'i sto vegnir installà supplementarmain in sistem da distribuziun da chalur sur l'aua (radiaturs, stgaurament da palantschieu). Quai ha per consequenza, che las abitaziuns na pon betg vegnir duvradas durant la sanaziun. Il remplazzament dals systems decentralis vegn perquai fatg il pli savens pir, cura ch'il remplazzament sa lascha cumbinar cun autras lavurs da sanaziun che ston vegnir

fatgas, sco sanaziuns da bogns u da cuschinas ubain renovaziuns totalas. Per re-sguardar quest fatg na vegnan promovids generusamain betg mo ils produciders da chalur, mabain er il sistem da distribuziun da chalur necessari, sch'i vegnan remplazzads stgaudaments electrici decentrali (art. 20 LEG ed art. 46 da l'Ordinaziun d'energia dal chantun Grischun [OEG; DG 820.210]). Supplementarmain vegnan questas contribuziuns dublegiadas pervia dal Plan d'acziun chantunal Green Deal (AGD). Questa promoziun fa effect: L'onn 2022 èn vegnidas concedidas contribuziuns da promoziun per remplazzar 120 stgaudaments electrici decentrali e 37 per remplazzar stgaudaments electrici centrali.

L'Uffizi d'energia e da traffic infurmescha cuntinuadamain davart ils programs da promoziun a chaschun da sias occurrenz, sco p.ex. «L'avegnir da Vossa immobiglia cumenza ussa» (art. 32 LEG). Plinavant èn gia enconuschents dapi plirs onns ils programs da promoziun da las proprietarias e dals proprietaris da chasas sco er da las firmas d'installaziun. Ultra dal program da promoziun chantunal exista in program dad energieschweiz ([www.makeheatsimple.ch](http://www.makeheatsimple.ch)), per il qual la Confederaziun ed il chantun fan reclama dapi plirs onns. Cun agid d'in telecumond per la produziun da chalur pon ins spargnar fin 60 pertschient energia. Cunquai che blers stgaudaments electrici en il chantun Grischun èn installads en abitaziuns da vacanzas, exista in grond potenzial en quest regard.

La pli gronda part dals impuls che vegnan pretendids en l'incumbensa, sco contribuziuns da promoziun, sensibilisaziun ed applicaziuns per spargnar electricitad, è gia avant maun. En il nov MoPEC 2025 vegn danovamain ad esser cuntegnì il modul stgaudaments electrici. Quel prevesa in'obligaziun da sanaziun.

Sa basond sin questas explicaziuns propona la Regenza al Cussegl grond da midar questa incumbensa sco suonda:

En il rom da la proxima revisiun parziala da la Lescha d'energia dal chantun Grischun (LEG; DG 820.200) vegn la Regenza incumbensada da suttametter il modul concernent ils stgaudaments electrici, ch'è cuntegnì en il futur Model da prescripziuns energeticas da la Conferenza dals directurs chantunals d'energia (MoPEC 2025), a la consultaziun.



En num da la Regenza

Il president:

Peter Peyer

Il chancelier:

Daniel Spadin